

大名縣志

崑山程廷恆題

73444

第一册

42  
新四二

## 大名縣志序

壬申之冬廷恆自正定移守大名携帶正定續編未定志稿簿領餘閒每與康民省三諸兄弟輩埋頭工作費時半年幸獲成帙郵還正定雖不敢云有終始亦自笑可爲好事者矣正定志稿甫經告葺復搜羅大名府縣舊志屢經兵燹蕩焉無存大名地居衝要唐以魏博雄都領節鎮宋倚北京重寄邊敵氛念時事之多艱翻悠然而思古所幸先我有人纂修舊志迄民國十八年止此四五年中人事之變遷政體之改革紛紜擾攘机隍不安益當淬勵精神周諮博訪間有將舊稿綱目刪繁就簡藉擷精華隨得隨錄以資瀕祭續貂之誚其奚能免猶憶乙丑丙寅年間廷恆長龍江政廳省令與金息侯先生會修省志稿將成政局倏變嘆滄南北消息杳如今則大好河山淪爲異域前塵在眼常用慨然可見文字因緣固有前定此志舊稿邑張孝廉步月呼孝廉如春范明經廉泉諸君熱心毅力贊助居多獨惜癸酉盛夏步月孝廉遽歸道山甲戌春先兄康民及廉泉明經又先後作古尤使致恫乎惟三君子不及親見刊行也爰據觀感而爲之序

## 大名縣志

### 卷首 序

中華民國二十三年甲戌六月崑山程廷恆序

## 大名縣志序

大名地濱黃河與齊梁接壤漢唐以來赫然爲畿南大郡其地固自重要其人亦多任俠好義有燕趙遺風民國初元釐定郡國乃舉元城魏縣而入於大名於以廢畛域壹政令蓋幾經廢興而始定縣故有志失修者百餘歲改制之後邑中好義之士咸以志乘續修爲不可緩民國十年縣令張君倡其議邑人王君澤春以俸佐之而范君鑑古呼君九澤實躬任編纂之役中經兵事稿幾燬者數矣己巳冬余謬主財府中秘來筦樞政閒與當事者議論其事縣令李君勛庵及縣中士紳咸以鑒定之責相諉諉於是志乘之事絕而復續迄於今茲始觀厥成夫方志之學肇於禹貢水注山經治史學者據爲典要然自二千年來郡各有志其傳於世者百無一二惟宋羅願之志新安明康海之志武功號爲殊尤存而不廢識者咸推其文字之功晚近章實齋謂方志爲史學之基必方志精審而史乃可觀誠以疆域之變遷山川道里之沿革夫固即物可知按圖可索者若夫財賦所入教育所係交通宗教之改易軍警守望之職司事變旣多紛紜尤甚設泥守成法則數十年後必將茫然無所考見今在事諸君子

## 大名縣志

### 卷首序

二

不畏難而沮其志且洞察時變毅然破常格而詳著之以樹史學與地理之基礎此其有造於新邦者顧不重且大哉余喜新志之成且不囿於昔賢之所爲知其必信今而傳於後也爰誌其顛末如此  
中華民國辛未五月貴陽戴百賢序

## 大名縣志序

戊辰秋余自東明調署大名大名自三區合併以來爲河北第一特缺地廣事繁畛域未化號稱難治時值大亂之後繼以凶年府庫匱於上杼軸空於下既竭其力以饜軍迨客軍驟去腹地空虛伏莽四起民之苦匪又甚於苦兵其難治蓋十倍於昔余乃調省軍練縣隊注全力於剿匪掃蕩月餘盜風漸熄交通回復閭閻安堵始得著手庶政於是舉行清鄉調查戶口驗烙民槍勘辦災賑以及催科治獄整頓賦稅清理積案革舊維新百廢具舉而續修縣志亦同時告成司事者將付劄牘來請緒言余維縣志即一邑之史乘其體制首當注重民生中國久處專制政體之下歷代史策所載無非帝王一姓之興衰君主一人之言動與民事毫不相關惟司馬遷氏頗識治道故其史記於學術則並列諸子百家於民風則兼採游俠於物產經濟則特著貨殖而論者不察護其儕九流於六經駁而不純其傳游俠貨殖爲發洩身世之忿懣嗚呼何其陋哉自班范以下諸書陳陳相因無復生氣國史且然遑論縣志河北縣志向惟清初陸稼書先生之靈壽志爲最善蓋能詳述田畝賦稅差徭之數土質之瘠物產

## 大名縣志

### 卷首

序

三

之嗇民生之艱其時胡虜入關未久滿人虐斂方張故兢兢然取保存主義以防日後橫征暴斂額外誅求其用心良苦然亦不得泥爲縣志之極軌也方今國體改革民治發皇建設方興如禮教風俗村制戶籍田畝稅則道路森林農產工業凡所以爲民衆謀樂利者莫不有宏遠之規模精密之計畫竊計不出十年自治美備必有新式志書出版一洗從來束縛簡陋之習然則今日之修志不可姑緩以待將來之美備乎是又不然大元各有舊志年久失修自合併十餘年尙無成書夫以一縣之殷繁乃至無一完全之志書爲政者將何所考證國府省府及各官廳之徵求縣志函電時頒將何以應命況當新陳遞嬗改革紛煩及今不圖後來者將何從藉手譬諸築室必先植基是書雖不免簡陋然取材務廣博徵事務翔實賴諸士紳之力辛勤數載而後成以爲他日莊嚴建築之始基不亦可乎後之君子或有取焉

中華民國十八年二月調署河北省大名縣縣長古閩葉震東叙

## 大名縣志序

民國九年冬東區王團長澤春自蚌埠團部滙銀幣千圓寓書勸學所長王君

宅西曰吾邑善事當辦者多吾在外不能提倡君持此款爲我代勞可乎王君商於縣長張公昭芹公曰城東三里橋傾陷不便車馬先提出三百金以辦路政其餘作爲續修縣志之款不足再爲籌畫事無要於此者蓋大名縣志中西兩區自乾隆五十三四年合修迄今百五十餘載東區縣志修於同治十一年亦幾六十載中間事實均待補增茲事誠不容緩矣明年邀侯及李君瀛來郡商酌進行事宜延王君振孟張君蓮升到局開辦張公又延馮君冠儒測繪全縣村落以備志書繪圖之用即十四年三月初版之大名縣詳圖是也又東區王旅長茂桐中區趙旅長玉魁因局款支絀各贈百圓以襄善舉十一年仲冬款已用盡李君積勞卒於局中明春張公亦調任趙縣去此事遂停侯乃携全稿歸家自行緩緩編纂十四年夏議參兩會屢書敦催來郡籌辦接修有中梗者事又寢明年五月趙縣長鶴史議長錦雲又頻書催邀爲梁司令壽愷編輯大名戰事記略議編完即接修縣志六月中趙縣長去王縣長炳照來七月中縣志開辦以議長爲局長專司其事復延聘多人以期速竣秋節前王縣長又去嗣後調查困難以致進行遲滯十六年四月間各門類始草草脫稿議留侯

## 大名縣志

### 卷首序

四

及孟君懷謙張君之桂校閱編補不數日黃沙會進城時局一變志稿幸未損失仍歸侯保存又携之家中而校編焉八月孟君捐館議定呼君九澤繼其事十七年九月葉縣長震東催修縣志侯及呼張二君又歷數月而事始竣甚矣修志之難也緣此志始終九年經多少波折歷多少變亂而茫茫墜緒終能尋而續之者則皆諸長官及各機關人員提倡之力也謹述其梗概而爲之叙  
中華民國十八年七月范鑑古述

### 大名縣志序

國有史而典章備家有譜而世系明伊古以來忠臣義士孝子順孫按歷代之遺編閱數世之宗盟皆足動其愛國愛家之真忱制誠善已縣之有志所以記往事垂來茲者實與國史家譜等我大元魏三縣當未合併以前各有志書元城縣志創始於清康熙十五年續修於同治十一年大魏兩縣志各創始於明嘉靖間洎清乾隆二十三年兩縣城均被漳水淹沒移大名縣治於郡城改魏縣爲大名縣續修志書統顏之曰大名縣志迄今民國紀元三縣合一劃大名爲中區元城爲東區魏縣爲西區稟承 上峯以大名二字冠之名爲一縣其

實田賦學警諸要政各辦各區各花各款不相混合此人情地勢使然不容強也對於縣志一節不續修則多歷年所事盡湮沒無以爲後人考鏡之資仍分修則地廣民衆一官管轄又不符三區共和之義由是官紳會議訂修一編魯恂張縣長提倡於前煥章王縣長敦促於後邀集三區士紳設局於城內分門別類各任編輯緣時局不靖幾次波折嗣蒙歷任縣長以事關重要屢催續編終觀厥成幸何如之此事開辦於丙寅八月告竣於己巳十一月乃知發凡起例創之者煞費苦心補舊增新因之者不遺餘力所望後之人觀此邑乘節節續修俾全書永垂不朽更足爲吾大光也爰序其崖略以弁諸簡端云

中華民國十八年十二月呼九澤綴言

大名縣志舊序

大名縣舊志自明嘉靖四十四年知縣朱湘始魏縣舊志自明嘉靖十八年縣丞劉望之始元城舊志自清康熙十四年知縣陳偉始大名重修者四魏縣重修者五元城重修者一大魏合修者一今三縣歸併撰為一志舊序據先後備錄知縣志所由來者遠矣

大名縣舊志隆慶四年知縣李本意重修邑進士山西泰議楊守愚序曰隆慶歲丁卯元朱瑞陽朱湘公既作邑乘矣越二年己巳三漳衛漲溢隄決城壞誌板亦衝泊無稽時有議省大名入元城者太素本李公奮然起曰城雖壑可襄也宇雖圯可葺也忍邑自我廢乎謀於鄉士大夫咸抗議不可邑賴以不省焉抵今年庚午四邑務稍就矩矱而誌板流沒良可慨也且自被患之後營治一新建置之制提封之迹果沿夫舊而無所異同歟以學校秩祀則起敝維新者多以官師選舉則宦跡轉蓬者多以列傳藝文又有當繼入而不可泯沒者多遂托張君東漁師伊趙君有莘來聘開局於應龍書院取舊志而增損之公亦自臨鉛槧凡兩月事竣又兩月梓成予伏讀數過歎曰是可與瑞陽公之誌

大名縣志

卷首

並傳矣公英明果斷振殘破之邑而恢張之固不特一誌然也惟予與公以併縣事不克仰承上人均被譴怒是又受公之知於患難中矣今誌成烏可以不序

萬曆四十一年知縣李一鰲重修邑進士兵部右侍郎李景元序曰余頃以讀禮山中人事都絕明府趙公名一鰲枉干旌而見顧曰邑乘備一方文獻計自隆

慶庚午四迄萬曆壬子十缺畧莫考將無徵是懼子大夫明晰今古其勒成

一家言用垂不朽可乎余謝不敏會史氏成靖之命民部張平仲字居里二公

才饒學賅故號宗鏡選士張洵夙負博奧專事屬草之役閱歲告完始建置終

補遺凡二十卷巨綱細紀靡弗備陳乃繕寫陟釐抽研帝虎而上之明府方付

梓人適衛水暴溢明府亟請塞河為鄰封令所窘遂投佩以去今明府虹西李

公來公卓犖開敏不數月治具畢張尤加意文事慨然欲竟前工余與選士張

君以稿請正明府覽而善之乃為鳩役給食越五月竣事蓋趙公翫始而李公

成之勤劬為尤倍云余竊惟大名在唐肅代時戎馬交橫自田侍中父子携魏

貝歸朝始沾王化迨宋寇萊公韓魏公相繼治魏益履履循理且愜邑屬三輔

稱首善也暨今人文日懋當途者修金馬石渠之業待年者讀盤盂邱索之書  
含毫紉思娓娓千古而又值賢令尹雅重文獻頓成茲書余不敏幸藉衆長何  
敢希蹤往哲倘得附於杜預諸少孫爲左傳史記之方外臣也有厚幸矣故不  
辭而序之簡端

知縣李一鰲序曰余不佞以時屆重光爾雅太歲在辛之歲杪承乏大名會徵

逐簿書無寸晷暇比蓐收孟秋之神司辰商風漸爽少司馬元石李公選士張生洵

緘邑志數帙示余曰此前明府趙公所甫鐫而未竟者也余受讀再四大抵提

綱纂要星稠綺合囊括載籍馳騁今古洋洋乎誠大國之信史也遂開局公署

鳩集剗人凡三月而工竣不佞僭爲數語弁其首竊考古者列國諸侯守在四

境舉境內而疆理之載筆特書具有圖籍故邑之有志猶國之有史也然匪博

弗該匪慎弗精匪公弗協作者往往稱難今司馬才拔三長業已狎主詞盟張

生亦夙號博奧而其間政治之因革風俗之汗隆食貨之盈縮賦役之繁簡人

物之臧否又皆稽實跡於六曹溯遺編於百氏訪遺縱於父老付月且於膠庠

如所云博慎公者蓋兼之他日軒輶有採持此以上陳規典則日落月稀之感

大名縣志

卷首

七

或可以少寬矣余又惟今海內郡邑之志不啻如林獨彰德武功稱最彰德以

後渠崔先生能重武功以對山康先生海重皆以尺幅鉛槧之業不朽千秋司

馬公方將入秉樞衡著述正未有艾邑志直其一斑爾異日者大名當以司馬

重與後渠對山兩先生後先媲美不佞辱在彰德武功之列亦尙與有榮哉

知縣趙一鶴序曰郡邑之有志所以表列憲章徵信今古俾柄政者得奉而從

事固非亶以資格得竟其美者大名爲邑獨小而樞轂中原襟帶齊魯拱衛郡

城勢雄三輔亦要地也屬者抗衝供輸每稱力絀重以河流不仁隆慶之災蕩

析離居騰議併省大名幾不邑矣賴當事者力爭城社不移其定傾存亡之功

不可忘也一鶴承乏宰官受命飲冰間取邑志讀之溯隆慶庚午迄今萬曆壬

子襍逾四十代更兩朝損益典章寧無可舉苟令湮滅安用長人適少司馬元

石李公讀禮里居覃思著述文獻足徵不佞乃以續修爲請選士張洵宏覽博

物君子也專事屬草凡浹歲告成不佞得以卒業則網羅裁補咸正無缺討論

潤色視昔有加允稱良史有光琬琰矣遂付劄氏未竣十之一二偶以寒河築隄  
迂旁縣令掛冠還吳會今侯虹西李公天才倜儻百廢俱興願獨軫念文獻

急就殺青令不佞微名得附驥而益顯也實厚幸矣又獨念大名既免河害又煥編摩稍稍慰不佞爲民請命爲邑摛文之夙願即陞伏山林又何憾焉乃輒序其顛末若此

邑翰林院編修成基命序曰張若洵輯邑志成以謁選携入都門過示余反覆其集始建置迄補遺凡二十卷邑之川麓田賦星紀祠祀風物官司文獻校祥下逮池隍坊表遺圖膽牒罔不臚列而藻采蔚然稱完璧焉乃作而應曰備矣復何言無已請畧申志義夫志猶史也史之大綱惟不虛微不隱隱而志異乎哉然史以國著有專職職之所在即君卿大夫之威靈執簡者得以侃然擬議其後無少顧忌而志然乎哉以邑之備取邑之人與事品騰而籍記之勢已不容不有所避乃其品騰者非官師之尊崇即族黨之先生又未可顯置雌黃嚴爲月旦是史之直易而志則難也志之直難而以邑人直則難之難也今集中所載良吏名賢皆琅琅數語比於華袞無或溢矣而因事肇畫如河防三說尤最較著蓋前此議驅漳衛環郡郭以爲美觀而不虞沼吾邑也賢長令與之籌堙塞且不保其文組以去矣他若士敏而近於儉俗漸而聽於神租庸侵併之

大名縣志

卷首

八

弊竇城堞頽圯之隱憂亦皆詳切指陳勒志不朽暢哉晰言之乎余不佞曷敢稱引信史妄諛若恂而重沒作者苦心竊爲昭揭如此至兩明府政教雙美後先推挽力成茲集則諸名公序之詳矣又奚俟喋喋云

邑人張洵序曰不佞曾弗如瓜望之能食神仙字也先後辱兩明府委勒邑乘念筆札自吾事未敢告勞維時少司馬伯善李公太史靖之成公兩先生丁憂居里允稱文獻且諸長年紳舊洎博士文學輩胥諸舊典型可副周誡不佞乃竭管涔之見往復考質不厭研尋幾經歲成書卷凡二十綱凡十有七日凡四十有一方梓間適明府趙公以塞河築堤迂旁邑令議調去會今明府李公來公天材揮灑於諸廢無所不興不佞以間投邑乘舊帙請政明府意若爲不大鄙棄者遂庀材鳩工計五閱月工竣吾夫子有云述而不作不佞謏聞識安敢謬附詞壇第家世嗜書自先大夫濟寧公積書至萬卷不佞日漁獵其中稍知梗概於是倣歷代國都地理圖地理志而作建置志提封志倣甘石星經天官書而作星野志倣河渠溝洫志而作河防志倣風俗通貨殖傳而作風俗志方物志倣家語學記孔門弟子列傳而作學校志倣禮樂志禮書樂書封禪書

而作秩祀志做平準書食貨志而作徭賦志做百官公卿表古今人物表循吏傳儒林傳而作官師志選舉志宦業志人物志做外戚傳而作恩澤志做洪範五行志而作災祥志做皇覽叢談四部七序而作藝文志做爾雅埤雅博物志酉陽雜俎而作補遺志諸所臚列皆根源經史探評月且靡敢自任黽勉編輯糾合衆長以畢兩明府委責至意以章先大夫藏書素心是峽也儻比於古人謀野之義可乎若夫鈎深提要據古證今則有履台攝斗之老玉堂石渠之彥在遂銓次其說以綴於簡末

清康熙十五年知縣顧咸泰重修知府顧耿臣序曰史之流也九邱先六籍地象做河圖尚矣曰荒而勿之稽也禹貢別九州等九賦地產方貢既臚列矣曰詳於物而畧於人也周官職方等男女均多寡既陳民數矣曰性與俗未之及也迨管仲父著水樞列齊楚越晉燕宋六國貪蠱簡易之俗班孟堅志地里列秦蜀吳越凡十三國而柔懦而剛毅而樸野夸奢而剽悍巫鬼始補夏書周禮所未備邑乘雖僅序方域之內猶列國之史也大名爲魏郡內附故邑隨郡稱天居室壁地接齊豫導漳及河登愜望休美哉繡區雖四境相距百里而遙實

大名縣志

卷首

序

九

郡城臂指連亞擊柝相聞也峩然登高博望馬陵歷歷在目子魚春秋長孺漢

字輩挺生其間照耀千古官其地友其人經紀其政事詎可缺而不志與楚蘄

顧君思菴之宰是邑也有古良吏風獨事振勸修城隍奠廬并葺學校祀名哲

循良以及斷碑殘碣遺文墜什拾於奧突荒蕘者一一釐正裒聚成帙咸可叙

而可歌適奉功令修一統全志謀諸相國青壇成先生克襄其事先生家本邑

望兩世任史職後先歷政府一時相業班班光昭史冊迺考載籍備掌故博綜

遠覽挈要提綱不數月間已臻厥成問序於余余攬其體要披其菁華繙閱斯

志襟帶險易犁如也物華人瑞炳如也土風民俗秩如藹如也則又徵予耳目

之有徵焉以視世之陳陳相因舐篋無當警諸瞍矇誦詩闡寺傳令者相去奚

啻什伯哉雖一邑也而全志之規模具此矣

通判何英序曰邇奉令修一統志郡邑咸采大名固郡南首治也邑宰顧君繕

志成書余媿不文何足爲顧君重惟是顧君治行有古循吏風而大名偉人傑

士後先濟美今閱斯志見文穆公成之相業巍崇劉大司空選之鳩工著績

郭撫軍增之建節大梁以及暨司訓榮保護都憲左子弟不禁喟然興歎曰

郭撫軍增之建節大梁以及暨司訓榮保護都憲左子弟不禁喟然興歎曰

之數公者宏勳偉伐彪炳天壤即以是光邑志志且不朽矣况忠臣孝子高  
烈婦更未易更僕數乎顧君涇陽先生後也東林講席氣節猶存當下繹一卷  
爲性學傳燈服習有素故於君子小人之分公私邪正之辨尤詳哉言之至築  
隍飭學捍渠輕徭種種佳績特君遊刃事耳其於政治之沿革食貨之盈絀賦  
役之繁簡山川之幽秀無不綜覈諮諏抒其風月雲露之奇光璨瓌琰言言經  
濟始知家學淵源本性真者不作郭廓語也他日正色立朝之概忠慎亮直之  
風悉於此乎卜之矣故不辭而爲之序

知縣顧咸泰序曰攷大名爲郡南首治風尙近古臨愜堰以俯眺古河登銅臺  
而縱觀曉嶂其間牧隄夜月古蹟靈湫覽朝霞於菱岸沐陰雨於蓮池沙隄遠  
浦間衝渚歸帆誌勝清風白水紀村快一水之中分喜雙城之對峙翠柳颺新  
青楊聳峻環垣晴暉遙堤古渡以偉觀也方今聖天子敦崇文治詔纂九土通  
誌頒檄海內各哀邑乘以備採集泰承乏大名凜凜知罪自揣固陋焉敢言文  
顧以人文聚於地國典因乎時時際昌隆地靈愈啟爰遴士開局櫛編授簡自  
明萬歷以來俱旁搜博采裁於古良史之載筆請諸賢大夫之持衡每集嘉懿

大名縣志

卷首

十

訂正必嚴寧簡毋泛寧守繩墨毋侈恢奇勉且慎數閱月告成卷凡二十綱十  
有七日四十有一率舊以輯之庶幾斯世共諒焉間嘗擁武陽拱華岳騎山香  
雪之區古懷如晤今書成下備民風上昭盛治垂千秋之業勳一統之全將見  
寶善非侈白珩離騷續諸風雅既足答山川之靈且以預輶軒之探厥不美哉  
魏縣舊志明萬歷三年知縣李幼淑重修自序曰粵昔周官外史掌邦國四方  
之志志國史之流也宋晦庵朱子知軍下車即訪郡志志又政事之當務也然  
江海有言作史之難無出於志志固不可不作而又若是其不易作也蓋其立  
法貴簡徒簡則略叙事貴詳徒詳則漫核實貴實徒實則俚修詞貴文徒文則  
浮作志之難大率此四患耳余爲此懼故先立五綱以求其簡條列二十八目  
以求其詳六叙爲經以求其質九論六十一贊爲緯以求其文顧政無多暇才  
款旁通掛漏之虞殆所不免粗掇成編以俟博雅君子訂焉適蒲陽蘇子自大  
梁來乃忻然曰史才至矣遂延叅校且幸獲就正於鄭翰史東里先生國隨釐  
五卷分爲四册夫百乘之邑肇於分土之封故首輿圖一國之務成於制度之  
周故次創設紀法備則治教明故次秩官法教明則賢才出故次人物賢才盛

則著作彰故次文藝展玩之餘因自笑曰學步失故效顰益醜五綱以象五行而竟失之畧矣二十八日以象二十八宿而竟失之漫矣六叙以象六府而竟失之俚矣九論以象九疇六十一贊以象庶徵而竟失之浮矣擬諸江淹茲爲厚媿或有先進如晦菴朱子者訪焉執此以往庶幾免於祀宋不足之憾也敢曰外史云乎哉

邑進士陝西布政司叅政王光祖序曰自禹貢職方後至漢撰風俗而郡縣始各自有志則兼地里人物文章制度而有之魏爲畿南甸服股肱要地聲名文物之邦志豈可少哉邑故無專志志自內江一巖劉公之始創有於無厥功偉矣迄今又歷年舊梓已廢考稽無據文獻欲求足徵數固有待耶萬歷甲戌元應城會湖李侯受簡蒞任茲土慨然以修志爲己任政暇即秉筆直書發凡立例提綱揭目卓乎作者體裁適予甥鄭允升自中秘轉官柱史讀禮於家朝夕得以討論因徵莆田蘇子應科司校事及邑髦士朱生冠張生之銘申生繼善同校焉書成將付梓俾予序簡端予披閱之知志與政相關真急務也考輿圖而經緯詳紀創設而規制定譜職官而政教明紀人物而表式彰錄藝文而典

大名縣志

卷首

十一

章著其綜核古人闡揚光大叙傳論贊燦然有倫簡而盡詳而要質而不俗文而不靡使曩時曠典頓見完書誠吾鄉斯文一快事也昔左邱明作傳世有左史之稱韓宣子聘魯嘆周官法度之具在侯敦典崇禮潤治華國後當以左史宗之觀魏乘者亦如宣子之觀魯典而嘆服無疑矣夫盛美難專兼才難得故優吏治者或短於文工文詞者或闕於事候視篆年餘而繕禁獄葺倉庾恢郵舍飭臺館固築長隄增修外郭學宮鄉社次第舉行其豐功偉績皆可傳誦修志特其一端焉盛美畢具謂之兼才非歟抑花萼書香得於長兄名卿義河公之家傳淵源有自耶予既庇侯之政澤而幸從大夫之後竹帛微名復藉以垂不朽序固所樂爲者第羨侯之懿深而愧予之詞淺序之有不盡序焉耳

天啓四年知縣陳序重修自序曰魏有志幾百年而修者一星野冥麗固閱世有常次而水陸不無滄桑之變兼歷年來賦稅相時加減世風因時變移人文乘時蔚起前志不能載近日事猶今日不能載他日事也苟樂因循而謝纂修不惟失作乘之意亦大負文獻足徵時矣雖然世鮮班馬誰爲秉筆者余因博訪得龍臺馬君道才學富閱歷深與之抵掌而談某人某事歷歷如數家計吾

固知魏乘在馬君腹中矣造廬而請遂得援筆直書運心思以虛公即夜繼日不憚勞也補已往之缺畧續後來之未備可仍者存其舊章可釐者出自新裁詳畧總因乎事蹟美刺亦各肖其面目俾觀者知星辰之分布疆域之廣狹人民之生聚風土之淳樸城郭鄉村之各有定位賦稅方物之不廢成規官斯邑者孰有善可稱孰碌碌無聞亦隱然見於言外與夫科貢中名卿大賢羽儀鄉國天下者亟登之以爲矜式兼收藝文之最關真切者以備一代之詞章巨細編舉草創告竣於是就正元白李公正瞻愚徐公好旭谷王公和核實衆美集而志遂成矣余不文間有去取不過就往牘而折衷其煩簡若夫督工而觀厥梓則余役也或謂多乘前人所已收似近於隘然故板猶存而不毀未始非雅道也

邑人進士刑部尙書李養正序曰邑侯陳公以魏志之久湮也授簡馬大夫重修焉比脫稿來徵余序言馬大夫者蓋原任開封貳茂學也少好太史公書爲文洋洋自恣殊有關九疑浮沅湘之概既受纂修之任邑人士竊竊然議曰大夫懷才未竟此正其傾囊倒囷時也必將開館呼朋發凡起例蒐羅佚蹟披收

大名縣志

卷首

異聞務與海內通邑大都爭雄長而閉門未一月輒以獨力成之卷帙視前更約其半何遂精緻至是大夫曰是役也侯命之矣寧簡無煩寧質無綺予蓋任刪不任潤耳夫志即史也自昔史家稱良者曰信史曰實錄不則爲蕪爲穢屬詞比事彰往訓來豈故以誇多鬪靡也乎崔仲鳧錄修鄴志曰涉誤近諛者並以義刪之不能登載而董見心復亦云余往爲陽邱志不浸浸近誣且靡乎乃今爲黃志始免此二累公之心誠有得於二先生之意矣名曰信史其誰曰不然抑非獨此也公之治吾魏大約以清真簡澹爲主尤差尤費剷除殆盡勸民息訟桁楊臥草間村落中終年不見一青衣隸嗟嗟使長民者率如是天下詎難太平又何至煩朝廷功令再三申飭哉公種種善政謙不肯書然則傳循吏者自有國史載矣

清康熙十九年知縣李尙斌重修自序曰先是上允曲沃相國請修皇清一統志令各郡邑以其乘上之史官以備採擇甚勝舉也魏乘前令已應憲檄未及修遷去斌以庚申年十九秋承乏茲土於退食之暇間取邑乘卒讀之往蹟文獻非不具列然修之於有明天啟甲子年四迄今幾六十年不惟明季之應續者未

續而國朝之應增者更當增修輯新書詎可緩視乎斌竊謂一統志合而職其  
畧也各郡邑乘分而職其詳也守土者又不應憚職詳之勞者也踵事增華非  
異人事因思九州之別列於禹貢職方之詳載在周官則志之有關於政治也  
由來尚矣顧魏僻處天雄之西與廣平之鵠城在肥鄉縣乾侯在成安縣東南壤相接且與  
豫之鄴臺即今臨漳魯之斥邱故城在成安即乾侯邑也為表裏固犬牙相制之邑也獨是魏遭漳  
水之患其治三徙於此境內殊少名勝然亦有社稷亦有民人閭里俗習風氣  
關焉故若星野沿革若疆域建置若山川古跡若學校壇祠若風土田賦以及  
職官宦業選舉人物孝義節烈典則宏文諸大綱臚如指掌燦若列眉皆足以  
見與朝因革損益之盡善亦因以見古今時勢難易之變遷其間疑以傳疑寧  
闕焉信以傳信特書焉總之寧嚴勿寬寧樸勿文是志之體也亦斌之志也云  
耳斌自媿疎劣兼以簿書案牘之擾未能獨肩是役紳士咸推邑貢士王君錫  
命王點之子為家學名宿因委任焉免斌金銀伏獵之誚兼鮮魯魚亥豕之訛者皆  
王君之力也斌借之上下商確字校句讐俟於辛酉二十一年仲冬竣於壬戌二十二年  
孟夏凡六閱月斌捐俸終其事再取而卒讀之乘雖一邑乎涓流裨海輕塵益

大名縣志 卷首 序

嶽層疊而上之史館其於一統志未必無仰資萬一云

知縣金協廣序曰今之縣邑猶古之侯封也封有百里七十里五十里之殊而  
邑亦有繁劇大小之別其邑中之事上自分野稜祥日星雲物下至方輿形勝  
風俗人才賦役興除戶口登耗靡不畢載視邑如國視國如天下故修統志者  
必取之乎縣志而各邑之志不可不及時而搜輯也魏故有志修於故明天啟  
之甲子四年我朝定鼎以來歷年四十聖天子作於上賢公卿承於下一時守宰  
皆極天下之選生聚教訓愛養民力亦即靡然向風而官斯土者因陋就簡缺  
焉弗綴上下六十年之間文獻無徵篇帙蠹蝕後之欲修志者將於何而考之  
此聞中李使君下車未幾即進諸紳士而謀之也獨是生於前者紀焉而弗詳  
生於後者略焉而弗述時則明經王君錫命手一編以進條分縷析羅列無遺  
使君取而卒業焉然後知掌故所缺悉為青箱所收蓋亦用力之勤也亦已久  
矣由是載稽往蹟鄉耆是詢筆削不苟足可傳信閱六月而告厥成使繼是者  
皆以君之心為心則何利不興何廢不舉可即是而推之矣壬戌之夏使君適  
以事去余承其後蕭規曹隨勿敢失墜念君為其勞而余享其逸凡其未竟之

緒以次成之此又余之自勉以勉夫後之人也故著數語於篇首

邑舉人廣西布政使崔維雅序曰吾邑處洹水之陽左氏曰魏大名也燕之南梁之北地大物衆密邇輦轂聲教先被數百年來名碩接踵與彈丸偏隅文獻無徵之邦異矣邑乘一書屢經前輩修輯或刪或增典章昭著一國之信史也自有明天啓甲子四年邑侯濟陰陳公序一修之後幾六十載矣其闕而應續者固多皇清御宇一代之制度文物損益因革更應紀載閩中李公向來治吾魏百度釐舉謂通志一事久奉上憲之檄若因循仍舊非所以遵功令亦何以見政治耶乃慨然以秉筆身任與吾友王子錫命廣稽博考校古續今六閱月而卒業凡事之應傳者咸備具焉伏念天子睿知好學博極羣書一統志既哀成於史館而一方長令借鄉之士大夫操觚而司掌故庶有以備採取也非李侯有此舉不幾爲吾邑一大闕事乎余自都門之粵西藩司任便道過里得讀侯之新志嘆服此書之精核摭拾遺文搜訪軼事既嚴且詳而更加意於闡潛發幽雖窮閭僻鄙必爲表彰使觀者感慕興起一遇輜軒採錄即可登彤史而垂後世彬彬乎盛也哉且夫志爲一邑之書而六經諸史之義罔不具其山川田

大名縣志

卷首

十四

土典制則周禮職方也其天象人事品物鉅細則洪範五行春秋國風先秦史記漢書也士大夫淵軒吳窮遐荒而失諸閉里故事安在其爲知本者乎讀茲志者考國憲勳職業服先疇法懿行教子弟警頽風其有關於政治大矣

康熙四十六年知縣蔣芾重修自序曰余之輯魏志也記事而已非敢職修也聞諸邑之有志猶國之有史職史者非具二十分才識二十分學力則不勝任於志亦然非衡鑒昭明才學敏瞻則取舍未必出至公是非未必協至當筆削未必成至文故修志亦難余何人斯敢以他人之所難者爲易而輕任之乎獨是魏先有志修故難言而任其缺畧不輯則又未敢思邑不可無志猶國不可無史國無史則天時地輿工虞水火禮樂兵農無所於載後世奚所考以爲法戒此史之有待於輯也邑闕志則官師政教徭役人才河防財賦無所於傳來葉奚所據以爲從違志亦安可不急事輯乎魏志修於前令李君向迄今已二十六年雖星野疆域建置沿革未嘗少更其中官師之去來政教之因革徭役之均偏人才之進退河防財賦之疎密盈縮固歲異而月不同矣不及今爲之編補迨後耳目所不及接必將有散佚而莫可考者况乎人才貞烈爲一方間

氣所鍾存之正足砥礪末俗乃李志則刪去人材一門汰除節婦數十輩是亦宜復收錄以示後者輯之誠未可緩也因是不遑諉謝爰於聽政之暇借學博諸君重搜前志博考貞珉據見聞之真確仍李志之凡例遺者補之譌者正之新者錄之俾後時衡鑒昭朗才學敏瞻矢志職修之君子按籍而稽叅以已見論事揆情芟繁就簡於以行取舍則取舍必公矣於以別是非則是非必當矣於以供筆削則筆削必文矣是則魏邑之有志不猶國之有史足以稱信於無窮也夫此今日輯之之意也如謂余摭拾成書有意以修志自任則是以史學三長俱足之所難而責余之一長未擅以不易也誣也故曰余之輯魏志也記事而已非敢職修也

雍正五年知縣馬襄重修自序曰邑之有志所以昭國典著民情別土俗俾官是邑者一寓目焉如指其掌庶率由而無過也予於康熙戊子四十七年蒞魏甫下車輒取志書讀之奉以周旋罔敢失墜以迄於今蓋二十年矣然自前任蔣君丁亥四十六年修志以來聖天子深仁厚澤日進無疆制度典章時有損益暨各上憲奉行德意美善俱書以致民情土俗益就醇懿草萊闢田野治訟獄清家

室無事而敦詩說禮之士鶚薦聯翩前後數十年間種種盛美皆舊志所無苟非逐一增修則人止見乎舊而不見乎新知其一而未知其二雖有志亦多缺焉未備之憾有司職主導揚詎宜爾哉商諸孝廉劉子翊暨各紳士皆與余有同志因囑廣為搜輯期於大備閱月告成遂付剞劂庶幾宣上德而垂法守可藉此以稍塞有司之責敢謂修志有待於余耶

邑舉人雄縣教諭劉翔儀序曰從來國必有史史者所以紀言紀事以垂鑒戒於來茲也自秦變封建而為郡縣故郡縣有志而無史然則志亦史也夫史何可輕言他無論矣司馬遷作史記如山之有岱宗河之有星宿千載望而却步者也而太公劉媪不能詳其姓氏三代諸侯牒譜年表世家列傳井井無纖毫缺畧豈詳於遠而近者不能考也衛武公諡以睿聖其切瑳琢磨之功瑟備赫喧之盛詩既詳言之矣史記謂其政共伯而奪其國果有是事耶然則史記之為書其學問之淹博筆力之雄健後人誠不能及而謂其傳信紀實不能無疑夫史不輕言而修史亦殊非易事也邑侯會稽馬公蒞蒞茲土者二十年政簡刑清兆姓樂業一旦以年逾七旬謝事賦歸余司鐸雄州還杜門却掃不預外

事忽聞公欲歸嗚然曰我公欲優游泉石如魏邑士民失慈父母何亟遣子孫輩攀留者再四公歸志已決不能回因思我公向以縣志自蔣公修輯迄今二十餘年託爲補續余致難者久之誠以志之修也立法貴簡徒簡則畧敘事實詳徒詳則漫核實貴實徒實則俚修詞貴文徒文則浮兼四長去四弊乃可修志况余老矣不親筆硯者久矣何敢漫以自任然史志之作也官師之先後人才之盛衰政教徭役之因革河防財賦之廢興其間靡所不載事既關乎一邑又重以我公之命何容以余之固陋聽其缺畧遂勉任厥事因集邑之素相往還者庠生路堪孝廉路旌又使子坤培孫彤堯共相參閱書既成惶然自愧余之學問筆力視古之良於史者知不能希其萬一而纂修邑乘竊附作者之後亦不自量也然紀言紀事粗存直道於今日以俟後之君子採裨史而垂鑒戒茲志也庶幾有助於萬一也云爾

邑舉人大城縣教諭崔緝麟序曰國家設官分爵內而宰相次而科道外而督撫遞至知縣雖祿位懸殊而知縣重與宰相等知縣有所行宰相乃行之知縣所不行宰相亦不得行之惟是知縣勢分卑遠須俟關牒地方之利弊民生之

大名縣志 卷首 序

休戚志欲行之往往中間多有所阻而不能遂故知縣爲最難非有批竅導窾之才罕能勝任而愉快也然實未得其人也今得其人焉如我邑侯馬公亦何弗勝任者公任魏縣二十年其政在地方其感在民生善之所及非一言能罄茲爲一一述之其最大而異者莫如格天魏值大旱草木不生公乃自帶鐵索持素步禱溽暑毒日不輟而甘霖爲之立沛如此者二次每歲施衣貧民患凍賴以獲暖每歲施粥貧民患饑賴以得飽凡理詞訟不煩言而立判民無冤獄凡待紳士惟和厚以接人樂相親近特買民房於東門建立義學延師教徒不惜束脩已二十年於茲逢文宗科歲兩試未嘗不誇魏之文風爲上新科中鄉試者四人皆由我公教之也今忽以老病致仕魏民欲奔縣以挽公公止之曰我去自有好官來何庸多事緝素叨愛下感激莫可言喻亦欲隨衆懇留窺其歸志決遂已焉夫人孰不願爲官若公之進退無所瞻徇者誠鮮矣因其魏縣志書告成將付諸梓人以垂久遠故謹爲之序

大魏合志清乾隆五十年知縣張維祺修直隸分巡大順廣兵備道瀨水鄭製錦序曰直省志乘夥矣幾輔通志而外州邑以靈壽稱陸稼書先生作大旨以